



2. maj 2024

UPA2024/118

Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C Jerimiassen, Atassut)

Aallarniutitut Inatsisartunut ilaasortap, Aqqalu C Jerimiassen-ip, eqqumiitsuliortut akissarsiamikkut pitsangorsaavigineqarnissaat siunertaralugu siunnersuuteqarneranut Siumumup tungaaniit qutsavigerusupparput.

Kinaluunniit Kalaallit Nunatsinni aningaasarsiortoq akileraartussaataa anermik pisussaaffeqarpoq. Tamannalu qulakkeerniarlugu akileraartarnermut inatsimmut ilassutitut nalunaarut nr. 10, 20. September 2011-meersoq pilersinneqarpoq.

Aqqaluk C Jerimiassen-ip siunnersuutimini tunngavilersuutitut oqariartuutigaa eqqumiitsuliortut allatulluunniit namminersortut CVR atorlugu akiligassamik nassiussinnaatitaanngitsaq. Tamanna Aningaasaqarnermut Akileraartarnermullu Naalakkersup akissuteqaataa innersuullugu Siumumit aamma isumaqarpugut una siunnersuut paatsuinermik tunngaveqartoq.

Eqqumiitsuliornermik suliaqartut kikkulluunniit CVR-normu atorlugu periarfissarititaasunik atuisinnaatitaapput taamaalilluni akiligassamik akileraarusersugaanngitsunik, suliffeqarfittut nalunaarsorsimasut allat assigalugit, sullitamut nassiussinnaanermik periarfissaqarluni. Periarfissarlu tamanna aamma malitseqarpoq, tassalu aningaasanik aqutsinerup, suliffeqarfiit namminersortut allat assigalugittaaq, ersarissamik nalunaarsuisussaataa anermik pisussaaffiliisumik.

Eqqumiitsuliornermik suliaqarneq aallaavigalugu suliffeqarfittut nalunaarsorsimaneq iluaqutissanik periarfissaqartitsisinaavoq, ilaatigut soorlu inuussutissarsiutigalugu eqqumiitsuliortut suliffeqarfittut ingerlataqartut naqissuserneqaataasumik, tamannalu tunngavigalugu eqqumiitsuliornikkut tapiissutinik qinnuteqarsinnaanermik periarfissaqartitaanermik. Tamannalu aamma eqqumaffissanik pisussaaffiliivoq. Tassalu suliffeqarfiup pilersinneqartup eqqortumik tamakkiisumillu aningaasatigut aqunneqarnerata nalunaarsorneqarnissaata qulakkeerniarnissaa

Taamatut naatsumik oqaaseqarluta, Siumut isumaqarpoq apeqquq qaqinneqartoq ataatsimiititaliami nalilersorneqassasoq, taamaattumillu Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamut ingerlateqqinneqarnissaa innersuussutigaarput.

Dines Mikaelson, Siumut